

懷遠縣志卷之二十

賜同進士出身安徽鳳陽府懷遠縣知縣孫讓修
耆舊傳



宋蕭洵荆山儒士與姚顯宗戴經李飛徐夢履姚仁壽等以儒行
自處不慕仕進善文章喜飲酒醉則文思泉湧弟子皆至顯官惟
仁壽仕至中順大夫廣州同知 舊縣志 舊府志

元高中邑人也祖泉仕宋為安撫使父文龍先泉卒中自少以孝
聞及祖歿哀毀逾禮事叔父文約如事父服闋中以嫡孫當襲乃
請於文約以讓焉至元間有司以事聞詔旌其門 舊縣志 舊府志 省志
姜起宗邑考城人隱居不仕平生多大節尚行義一門之內總服
百日歷宋迄元五世同居內外無間言喪葬嫁娶豐儉有節自郡

懷遠縣志

卷二十

傳耆舊傳

守以下咸羨其義歌詩以美之

舊縣志

舊府志

省志

馬希先樂善鄉人讀書博達善屬文舉鄉貢前父夢作靈槎賦已
而果然既中授陳留教諭不就性至孝甘旨之奉必盡其誠嘗曰
人當為人所不能為子路竭情於負米子騫昭孝於失靴予心竊
慕焉後廬祖母及父墓凡九年 舊縣志 舊府志 省志

何顯字希文本山東濮州人授濠州達魯花赤陞淮安路治中封
中順大夫卒葬荆山之麓因占籍懷遠為詩書族焉 舊縣志

院者都萬戶札古及子也世居荆山襲父爵守禦浙東時盜起海
上都奮力擒捕悉平之以功擢瀾東道都元帥卒於官子鞏哥兒

襲英邁勇銳有父風焉

舊縣志

舊府志院作阮

明常聚開平王遇春弟以功授明威將軍僉羽林左衛指揮使卒

葬賈村子孫世居懷遠

舊縣志心

按明史無聚名歷官不可考開平王子孫多散在雲南江甯今懷遠諸常多聚後也

據常氏譜聚乃追封安穆王之孫遇春從祖兄弟也聚生富富生泰泰生鼐亨鼐生符節亨生麟鸞鳳鵬

石凝字泰青宋都管轄石興宗元孫也元末自宿松始遷懷遠材武敏捷性仁慈恤下明祖興應運從戎入王重其雄傑以郡主下嫁隨營荆山之麓爰卜宅焉勳在王室尊爲儀賓祿入百石至今凝葬所猶稱八王營

石廷凝長子洪武初年充羽林左衛軍有智勇十三年撥充興武衛小校戰死

石堅柱次子也補父職進征有功陞本衛總旗洪武二十三年神鎗得勝選陞錦衣衛中所將軍二十八年授潘陽衛世襲百戶永樂九年授本衛流官指揮僉事十年從三寶太監下西洋中途病故上軫恤勤勞授世襲本衛指揮僉事

按以上三人舊志不載林晉奎錄石氏譜送

朱關其先山東館陶人國初以人才授泗州龍窩驛縣丞陞鳳陽縣知縣民德之後占籍懷遠歷官松江黃州杭州岳州四府同知孫輔天順壬午科南闈鄉試中式

舊縣志

周銓洪武己卯舉人庚辰進士授工科給事中歷官吏部文選司員外郎福建布政司叅議進通政司左通政都察院副都衛史賦性剛正有文學適用之才在位持法秉憲人不敢干以私首倡邑

中科甲後進之師表也祀鄉賢

舊縣志

舊府志

省志

按周銓於洪武時爲御史其所樹立當有可觀者而明史無之
邑中以之崇祀鄉賢而其生平梗概亦無有能詳言之者且并
其字而莫之知蓋其子孫頗式微矣

段菴永樂辛卯科舉人登戊戌進士選翰林院庶吉士改授中書
舍人陞大理寺右寺副本寺右寺正

舊縣志

明劉麟應送中翰段君還鄉祭祖詩序古之君子恆不以窮達
而易其心也今不然其未遇也俛首帖耳降志屈節以取媚於
時及其既遇也氣滿志得惟驕誇侈肆是尙予友段君志清則
無是已始予至京師識段君於大學觀其齋鹽布素未嘗以出
處爲憂樂逮其登第爲庶常予往訪焉視其色如在大學時暨

除中翰職清地要亦未嘗有矜喜之容其心之不易也蓋如此
又嘗以二親早逝弗克享其祿養爲悵洪熙改元廷臣有勞績
者咸賜誥勅及於其親段君既得追贈其父母矣今年秋歸省
塋域凡在交游者咸俎餼觴酒往餞於都門酒半予執盞告之
曰臣子之道惟忠與孝耳近士大夫有以省祭歸其鄉者往往
跡公府之庭遊聲利之域此豈孝乎至或慕戀鄉土歷歲踰時
以曠其職此豈忠乎君其毋然段君謝曰予不敏敢不敬佩斯
言於是眾皆知段君果能盡忠孝之道不以窮達而易其心矣
乃相與賦詩爲贈而予爲之序云宣德三年戊申八月既望

縣志

金鍾歲貢生力學嗜古任江西袁州府經歷居任淡薄蒞政勤勞

士大夫咸欽禮之歸田僅有祿俸而睦宗篤族處鄉里無慢容舉鄉飲正賓十一次壽九十五而終

舊縣志

楊鏞宣德丙午舉人正統丙辰進士授戶部主事歷官浙江右叅政公行已居官始終清謹爲士論所歸祀鄉賢

舊縣志

舊府志

姚鳳隨父庚任於河南中式正德丁卯科河南鄉試解元成甲戌進士歷官戶部郎中持身正行動法古烈奉差督甘肅永平山海薊州等處糧餉建議請發豹房餘銀助邊抽分九江祛弊防奸至招買通州濟邊草束并催太倉江西糧運歷有勞績後引疾歸以草廬終身其清約如此祀鄉賢

舊縣志

按舊府志云督甘肅永平山海九江太倉江西糧運

楊賓字大敬由歲貢任教諭純德重望子姪多賢長子時秀登進

懷遠縣志

卷三

傳老日舊四

四

士志行高潔歷官有聲人服家訓年八十餘卒祀鄉賢

舊縣志

楊時秀字叔茂號禹峯嘉靖甲午科舉人乙未聯捷授浙江海甯縣知縣調歸安陞南戶部主事歷郎中山東按察司僉事致仕恩例進階叅議公性行高潔歷官蒞事皆老成練達所著有春秋集傳其孫應聘克紹家學成萬歷癸未進士人以世科稱焉

舊縣志

舊府志

孫秉陽明奉政大夫山東按察司奉勅兼整飭兵備道僉事致仕進階中憲大夫禹峯楊公墓表禹峯楊公謝事家居十餘年矣頃蒙大賚推恩晉階中憲客歲初秋以疾卒公之嗣持所爲公之事狀請曰先君平生子所知也窀穸有日矣請一言以垂不朽嗚呼余烏足以闡揚公之盛美哉請述其畧以埃知公之

深者謹按狀公姓楊氏初名臺後改時秀字叔茂禹峰其號也高祖大中大夫子春於洪武末自浙之嘉興占籍懷遠曾伯祖鏞登周旋榜進士官至大叅曾祖銑祖成世有隱德及賓以選貢任陵邑司訓陞湯溪教諭母張氏生公昆弟凡三人長曰堂次日奎公其季也公生而純樸不事機巧性少鈍讀書每苦於記故常百倍其功然及其融也則皆牢固真切用之綽如而號善記者反有不足治春秋慮無師授湯溪公謂之曰聖經精微工夫到者當自得之汝第於經中熟玩之耳何事外求爲哉公自是潛心經旨日益融暢遂中嘉靖甲午鄉試登乙未進士授浙江甯海知縣以才優治劇調歸安公知浙賦多詭隱豪者賄滑書以恣其飛寄而下戶往往受并負薦之累於是嚴爲禁訪

懲其尤者一二輩且示以畫一之法而等賦始均矣至其興學育才鋤強植弱吏畏民懷爲縣三載聲實籍甚當道交薦行取授南京戶部浙江司主事分司淮安鈔關禁剔夙弊飭理封樁而額課無逋事竣回部稍遷本司員外郎未幾陞郎中在部持身清慎諸所措注務舉大體不求苛細先是諸郡縣遣役部糧北至京倉攢倖索費不慊則多方抑勒淹停歲時糧長多至破產公廉知其弊卽下令禁之自是部解者無羈留之苦注考上上在部幾六載陞山東按察司僉事分巡東兗道時有女妖號紅羅者作亂攻掠郡縣公移檄所屬合兵勦之賊黨潰散東方以甯世廟嘉之以原銜兼統武定分巡濟南道時兵火之後撫輯殘創宣飭憲典一方倚以爲重在任幾二載丁外艱回籍及

服闋鄉人勸以就道公曰祿仕所以爲親也吾父何在吾母垂老吾出何爲遂絕意仕進一以孝養母夫人爲心治家嚴整子弟童僕未嘗假以辭色歲時伏臘之儀與夫讌會婚喪之典悉舉之如禮而豐儉適宜爲鄉人法焉讀書勤篤一如爲諸生時詩文平易而造於理門生後進待一言以解所惑公亦不厭接引其賴以成立如玉田袁子濟海崔子古淮陳子輩蓋斌斌然矣嘗謂學者讀春秋而不考其傳是猶升堂而不由庭戶也故在部暇日采左氏要語及公穀二傳之不悖聖經者編附於胡傳之下名曰春秋集傳帝王世編多不稽語公刪潤成書彙爲二卷名曰三五紀畧朱子小學幼學病其繁難公於其中擇其簡要者爲一編名曰小學摘要於所居之後闢地爲園題曰後

樂園右爲祖先影堂晨興必展謁堂東有吟風臺臺之畔爲來青軒佳時召親友爲真率會酣歌投壺吟咏賡和寄情抒感諷時達治皆有作者之風焉公爲人明爽真實言動不苟鄉閭有患難救之如恐不及事關一邑之利害而王者眩於所處必倦倦爲當事者白之以求其克濟伯仲二兄皆蚤世其猶子邦憲邦直公振公輔公訓公皆教之以正而周其不及間爲之出資上納以榮其身娶徐氏生子三日逢元逢辰逢泰側室張氏生子二日逢和逢堯孫男應韶應詔應聘曾孫男一葬於縣北渦陽雙墩之側

歸安縣楊侯去思碑文 竊以禁勾攝則村龐甯鋤強梗則人虎屏革姦猾則狡兔伏公斷案則碩鼠遁兼之宣讓崇禮雅好

文事每公餘燕息輒哦諷自娛及與人交際雖相得甚歡或干以非則義形於色大率其襟度開雅才力優贍氣槩勁直故展施發泄有如此者緣是案無留判獄無停繫邑無廢典里無僨事上獎而勸賢下觀而成式嗚呼去者不復思者不置有由然矣屏石子曰美哉吾楊侯之盛於德也厚哉吾邑人之深於感也懋實者樹其聲懋德者樹其思外而不事非樹也樹而不永非懋也惟樹故立之卓而成也偉惟懋故發之大而人也深以是感民將桴鼓是應而影響加捷其有能讓者歟今夫近者遠之基天下者邑之積侯以學於家者尹甯海以其尹甯海者尹吾邑始也舉所誦讀推之以飾治既也推所成就守之以圖終由是而扶朝匡時將蒼生手摩而寰區心運煦哺之恩謳吟之

思會有徧於海宇者矣一歸安之懷德足盡侯哉雖然以一邑視天下大小遠近勢誠不同要之吾邑以地近而先過化譬則春陽誕敷而日南之區獨先燠焉則挾纊之感在吾老幼不能已矣然則片石之峙百年之思城野來同遠近流頌嗚呼休茲不亦後來君子之勸歟侯名時秀字叔茂文峯其號也鳳陽府之懷遠人嘉靖乙未進士嘉靖壬寅孟秋吉日縣丞孫糖主簿蘇茂典史李漢龍鄉宦吳龍方中孚費鏗張朝聲丁盈之等立

孫乘陽字斗南以恩貢中隆慶庚午科舉人辛未聯捷授河南登封知縣陞南京刑部主事改兵部陞武選司郎中廣東按察司副使備兵海南兼督學政坐謫回籍勘明準以原官致仕恩例進

階中議大夫贊治尹

舊縣志

舊府志孫秉陽字孟旭仕至廣東副使爲諸生時卽究心經世之務強仕登朝多所建樹老而嗜古問字門下者戶外履滿

薛相歲貢生浙江富陽縣訓導陞臨城縣教諭湖廣漢陽江西瑞州二府教授代府紀善致仕公儀觀修整文學議論絕人性至孝事孀母徐氏能盡色養徐以守節受旌養逮其祿人以爲難臨城志稱其孝有光於貞母忠無媿於作人信哉

舊縣志

薛希良由例貢歷任撫州杭州汝甯三府推官蒞事清直多所平反

舊縣志

陳鈿字子美歲貢生任山東鄒城縣知縣致仕儀度莊偉文學優長解祖歸閉門養重臨終囑其子曰吾無他長後有舉我人鄉賢

懷遠縣志

卷三

縣志

八

者當力辭之其自守如此

舊縣志

舊府志

梅效歲貢生河南確山縣訓導陞上蔡縣教諭博學能文工楷書

祀鄉賢

舊縣志

楊鈞歲貢北直隸永甯縣學訓導復除山東長山縣訓導陞直隸利津縣教諭岷府教授致仕公宦履清澹惟以書香世家嘉猷其

孫也

舊府志

徐琉字器之由歲貢除長治知縣未朞以母老解官終養母卒哀毀逾禮負土爲墳與弟珂析產過於推讓伯子拯居積稍裕貸者莫償勸令焚券貧者莫不感泣居家恥事干謁縣司重之引爲蜡賓年九十餘卒祀鄉賢

舊縣志

舊府志

江阡字天奇由歲貢任延津學訓導陞高密學教諭性方介教誨

端慈賑貧却費出於至誠既去兩學爲之立嗣後陞廣信教授因事關學校據理力爭權貴不悅竟以是歸門人以科名顯者衆卒於任門人周守愚過懷爲文以祭其墓祀鄉賢舊縣志 舊府志

城集

舊縣志

周汝昌字文明以隨父任入遼東海州衛庠中萬曆壬子科北闈鄉試歷任台盪懷慶歸德三府推官陞戶部主事耿介不阿心切民瘼消羣邪豁通賦均水利以忤魏璫議戍肅州以疾卒崇禎卽位賜還原官舊縣志

按舊府志云以不建生祠忤魏璫戍肅州崇禎卽位賜環而汝昌已歿於戍籍數載矣

懷遠縣志

卷二

傳者舊四

九

周希賜字一勿由天啓甲子舉人任甯洋知縣性慈祥泣任三月頌聲大作旋以疾卒於官士民公請入祀名宦至其孝友傳家敦詩說禮而廉介坦直洵後進之表式也順治十二年入祀鄉賢舊縣志

周希賜初授四川甯昌縣知縣以催科不及格調福建布政司理問補閩之甯陽縣蒞任甫三月有卓異之舉卒於官舊府志

許綱邑庠生以資當貢念其次張蕙母老讓與之後授祥符知縣因母疾不之任乞終養兄貧時資給之繪其像與已同坐曰兄無後欲異日與吾同受子孫享祀耳祀鄉賢舊府志

按舊縣志於歲貢類許綱下注云事見鄉賢而鄉賢並不及許綱今據舊府志補之

袁稽字大賓號玉田以明經薦宰高苑倅東昌治河有功遷泰安州守誅鋤強暴吏胥畏服有以黃金進者峻拒之修岱嶽十八盤至今便焉舊府志

按舊縣志載袁稽甚畧亦據府志補之稽後以瀋府長史致仕何森歲貢生廣東雷州府推官學識治才為時所重宦回均產讓弟人以是多之舊縣志

段綸歲貢生山東沂州府通判心術平坦文詞清儻死而無後士論惜之舊縣志

常存仁歲貢生任句容縣訓導江西都昌縣教諭兩學皆有去思碑舊縣志

陶孔教歲貢生任六合縣訓導陞江都縣教諭乙酉死事舊縣志

懷遠縣志

卷二

傳聞者曰

十

大清兵至揚州史可法督諸文武分陣拒守孔教與焉城破死之

王阿孫父官三病篤阿孫割股進食自愈母談氏病阿孫又割股

以進母亦愈有司以聞詔旌其門曰孝行時洪武二十七年舊縣志

舊府志

許本忠字克孝事父母竭力養志母愛少子本忠愛其弟益篤父母卒先後廬墓六年哀毀如禮有司以聞詔旌其門子璉讀書有大志事二親及居喪廬墓亦如其父邑人姚鳳表其墓云天性之

正崇祀鄉賢

明史孝義傳

省志

舊府志

舊縣志

王世貞許孝子廬墓記荆山之陽徵士許君諱甯之墓也孝子本忠之廬在焉墓面淮水水心西土如浮玉周環三數里左右繡嶺紆盤如龍翔如鳳翥墓適當南梅澗之曲其初巨石嶮

荆榛塞道孝子卜葬後手薙刈之廬三間在墓側面東後倚石一區爲支竈處外種杉松修篁數百本室內則一榻一几書數卷而已朝夕拜奠必誠必敬每清夜撫膺而哭林鳥格格相應飛鳴環繞若相慰藉墓前時起白雲遠望纍纍若纓絡朝現午隱率以爲常山中常乏火夜出每有白兔曲折前導戊戌秋飛蝗蔽天千里赤壤而近墓數百弓草木一無所傷入夜門戶不扃常有修蛇守護有盜數輩扣其廬爲蛇所逐呼號求救孝子出視之且教以改過自新盜皆感泣次早視林間掛刀杖衣帛等物知其洗心矣悉取而投諸河某大僚疑以爲妖過訪之儀衛甚赫俄見巨蛇從空而下驚危無人色乃亟返夫瑞應之說聖賢言之小儒則咋舌矣天地之生人也鐘鼎黼黻一鄉常不

乏數十人獨百行之原恒百餘年而一見以天所特異之人而竊以特異之事理之常也何所怪乎余昔於南都與公孫梅谷相友善今至懷遠又爲居停主人敬謁墓所梅谷一一爲余指述因爲之記

廖道南許公墓碑今上龍飛之三載分遣江南道巡顧宗英廉訪民間嘉言懿行有裨風化者詔舉行之事報越日代王府審理許夔抱其父行狀泣於朝曰臣家世篤純孝臣祖膺聖主曠典表其墓而臣父未獲旌揚求所以光泉壤者按狀君諱璉字仲器先世籍浙江仁和縣國初詔書遷懷遠及公越五世公少穎慧經史百家無不貫穴弱冠補弟子員旋食餼正德庚午歲孝行克孝公沒葬於邑荆山之陽墓故有舊廬璉復葺而居焉

哀毀過禮遂以卒嗟乎高柴少連泣血三年未嘗見齒聖人皆樂道之至誠之感鬼神所欽公之不獲與高柴少連同其壽考特有幸有不幸也後漢桓元鳳劉宋余齊民唐何澄粹皆以死殉父當時稱之史冊傳之并蒙褒異以爲世範然則如公者其烏可以無傳也夔居喪如其父許氏祖子孫廬墓者蓋十又二年焉贊曰淮山隱隱白雲英英誰保此宮許氏之塋

楊時秀代王府審理誥授中憲大夫許公墓誌銘公諱夔字舜卿號梅谷姓許氏高祖士良曾祖甯不仕祖本忠父璉皆邑廩生以孝行顯梅谷與余總角同筆研長五年且中表戚也兜時嘗余往梅澗孝子廬省其父徘徊不忍去嘉靖甲午應制都門梅谷以父病不得偕是科余舉於鄉而梅谷熒熒在疚矣往唁

之孑然居先人墓側顏色之戚哭泣之哀如其先人也服闋後自選貢授德州州判德爲南道衝州牧司倉庫民事繁劇一歸於判州民周立本者爲糧艘提撥狡獪百端民戶交納或益十之七而不滿其額公廉得其情言於大吏大吏卽命公清理公計量縱隻平受斗斛除符數外尙有贏餘因置周於法民呼神君尋陞河南禹州知州歲大旱詳報災狀經駁飭公部按鄉曲鳩鵠比戶慨然曰汝輩各圖生計催科處分吾以微官代請命耳卽詣藩署陳狀曰朝廷用司牧爲民也大吏不知民司牧不知民可乎藩意亦解遂得請任三年行取王府審理引見日備陳履歷上色甚和論日求忠臣必於孝子之門好供職居位三年多所平反時余亦計偕入都相晤於藩邸卽握手曰吾薄宦

十餘年每念先人隴墓寸心如割後數日病疏入矣歸里後鳩匠作修五世祖塋疊橋植樹煥然一新其仕審理日延名畫師繪三代像供陳祖祠瞻拜如事生禮居林下二十六年壽八十四卒病革時進諸子訓之曰先人廬所數椽屋汝曹雖不必居之慎勿傾圮也必葬我於祖父墓側朝夕得侍先人公生宏治丙申六月卒於萬曆庚辰正月葬於孝子塋石坊內銘曰太岳之裔繁茲淮水公侯子孫必復其始三世孝彰公濟其美瞻望白雲青山峩峩麟遊鳳翥蔚我巖阿泐石爲銘千古不磨

潘府褒孝集序孝經之文有古今人心之孝無古今許子親死爲其墓六年而感瑞鳥之來不誠而能之乎雖止一鄉一家之孝祝其所成而言之亦庶乎通神明動天地者矣鄉國薦之朝廷宋之名士大夫歌咏之蓋人心之同然也

李兆洛褒孝集書後褒孝集者許氏三世孝子旌於朝嘖嘖於人口一時賢士大夫詠歌其事以美盛德而維世教之所爲作也兆洛獲交於克孝先生九世孫所望因得悉家世受而讀焉晉書孝友傳稱東陽許孜廬宿親墓每一悲號鳥獸翔集鷹雉棲其梁猛獸擾其庭人號所居爲孝順里其子生亦有孝行圖孜像於堂朝夕拜之克孝先生故東陽族也明初始遷懷邑其三世純孝事乃與季義父子織悉相類如此所望有子曰星幼穎慧能詩文十二歲喪母哀毀骨立所望喪妻不再娶及將爲星授室星輒啜泣勸諭久之始成婚三年中生二子卽侍父外宿不復入內以攻苦致疾二十八歲而卒是其天性純摯夫豈

世俗牽私暱飾繁曲爲聲譽者所可及也嗚呼許氏固世有孝子哉

韋儒嘉靖十年辛卯母白氏遭疾儒衣不解帶湯藥親嘗每夜焚香籲天求以身代母卒儒過慟死而復甦遂病嘔血醫不能治竟於是年冬卒紳士房鏗等具呈知縣任俊申詳撫按各賜扁褒獎奏聞奉旨建孝子坊以旌之

舊縣志

劉澄懷遠人有孝行宏治年旌

按劉澄舊縣志不載江南通志有之今補入

張賢縣南鄉民及母歿先後廬墓凡九年晨夕香火畢卽負土壘墳若邱壠樹木成林時有鵲馴遶於廬畔賢以手近之亦不驚避皆兵一念貞純所召也嘉靖間邑侯秋公聞於督學馮公胡公

懷遠縣志

卷二

傳老日舊

十四

俱有石扁粟帛之賜本縣舉鄉飲大賓人慕其名無論遠近咸造其道而禮之年八十卒

舊縣志

陸欽母胡氏病故欽廬墓三年知縣駱公驗扁其門曰彰勸行孝

舊縣志

耿約世居考城鎮平生重義親戚貧乏者周之死而無歸者助以棺木性尤孝友事繼母劉氏如其母父卒廬墓三年荷土壘塚植木成林弟蘭早卒約撫訓其孤與已子同橋梁寺觀缺毀者出貲倡修歲荒出粟百餘石入官賑濟知縣王公扁其門曰孝義巡撫蔡公營田道史公皆有門扁之賜

舊縣志

徐瀛賦性剛直言動不苟父彥聰病割股爲羹以進病尋愈縣司聞之旌曰孝子徐瀛之門

舊縣志

袁體蒙平日溫仁謙謹輕財好義如那貸以濟饑民買藥以救貧病皆出自誠心孝養孀母周氏曲盡子職及母病朝夕守視湯藥親嘗憂念積勞髮髭盡白母卒未及二旬體蒙隨卒而妻周氏哭夫致疾尋亦偕亡縣令王公置扁旌曰善行遺芳

舊縣志

閔魁號篷山節婦高氏所守七歲孤也幼能知孝朝夕不離母側喜讀書因家貧廢經生業能詩善畫嘉靖時詔選天下畫士魁應詔擢第二與長洲沈石田相伯仲知名一時魯王延入府請授翰林院待詔旋即歸養其母高氏老不能寐夜起紡績魁煮茶進餽果數十年不怠先母而卒邑人哀之

舊縣志

許之俊年十七同父應元於萬曆辛卯蜡月渡淮河應元落水士儉大號數聲隨躍入淮心三日後抱父屍出本縣申詳請旌表邑

人楊嘉猷有詩哀之

舊縣志

王心字敬萱節婦蔡氏曾孫父良卧病十四年湯藥親嘗衣不解帶始終不懈母陳氏病百藥不效毀割股肉羹以進之遂愈父歿以遺產讓其兄隆慶三年邑大水捐金八百兩賑饑後舉孝廉與鄉飲介賓年八十六卒崇禎十三年題請旌表

舊縣志

王國光字仲觀殿之孫也明季諸生沈潛理學有聲郡邑見巨璫流毒縉紳折辱士林遂棄舉子業構屋渦濱顏曰片舫幽居不出高風淡懷邑里重之

舊志無鴻若皆從王氏譜採訪補

陳恭生平孝友居家守禮尙義樂施姪唐序廉廣四人早失怙恭愛之如已子俱撫至成立不忍分析後仍讓產與之知縣任公優以賓耆上臺給扁旌之後恭子佐死遺孤芝而諸姪感德亦如其

施以厚待焉芝亦克承先志益敦善行人稱世德

舊縣志

張聯達樸實務農不入城市與兄聯斗析居崇禎七年流寇至縣達負兄逃爲賊所虜賊釋達執斗欲殺之達曰吾兄業儒無儲蓄子種植尙有餘貲也遂帶至家罄所藏與賊以贖兄賊義而釋焉

舊縣志

魏班

按孝義祠神牌有孝子魏班而舊志無之遍訪邑人亦無有知其氏族者敬存其名以志憾焉亦所以不朽也

陳周字光楚才學敏贍善屬文爲諸生時弔卞和云把酒看荆山且一春風醉心事類卞和不酒卞和淚後將貢而卒

舊縣志

吳相子良佐號愛渠隱居教授門人多成名者孫秉陽少孤寒召

懷遠縣志

卷三

傳老日舊四

十六

使就學後成進士相所爲詩文平實而切於世教卒年八十四乘陽歸川後於所讀書處建愛渠寺以志不忘焉

舊縣志

沈江字伯滙早遊邑庠食廩以病乞冠帶終身居鄉授徒足不及城市者二十餘年衣鶉食藿人所不堪而處之裕如卒年七十七

舊縣志

吳璋字國瓚性孤介好古不苟同於俗年四十喪妻終身不娶訓

蒙自給隣婦憐其清苦乘間就之璋大怒詎卽移居別所行路不過其門其介如此卒年八十三

舊縣志

徐琦字周九邑廩生讀書多慧解筆亦奇橫中年棄諸生浪遊足跡半天下遺書甚多卒年七十有六

舊縣志

韋思敏字勉吾邑廩生性嗜沉靜博極典籍爲文根據性命時稱

理學先生 舊縣志

梅和羹字叔未別號長白山人賦性醇厚與物無忤世居塗山麓博學好友飲酒賦詩怡然自適卒年七十有八著毛詩括韻說學者宗之 舊縣志

李曦字日臣別號青眉居士慧性辨才絕無俗韻爲邑諸生安貧好古能詩善畫一時儒雅多推之 舊縣志

倪鯤字世舉府庠生困於儒術棄業遊於邑之荒鄙自號南山野人訓徒賣課以自給妻子不免饑寒而怡然不爲介意其去流俗遠矣 舊縣志

方燦字文若郡庠生性誠篤足跡不入城市喜讀書所著有毛詩四書講義通鑑纂要諸書 舊縣志

呂養性號四非邑庠生博學能文性嚴正生平以大義自命鄉居四十年足跡不入城市惟著書嗜古以自適所著有寄生草六帙宅旁大槐兩株因別號槐龍居士卒八十餘而終 舊縣志

楊濂號東泉嘉猷父也馮從吾東泉楊公墓表曰公諱濂字子靜別號東泉其先蒙城人洪武初諱選者避亂徙懷遠占籍遂家焉選生攬攬生朗朗生華華生環卽公王父也家世業農環生三子長諱鈞卽公父以儒術起家司訓永年改長山晉利津教諭終岷府教授初娶御史魏公貞曾孫女生公八歲失恃王母岳鞠育之繼母徐又生三子而公居長英敏慷慨有大志踰髫趨庭學舉子業卽能解悟人以爲進取有機矣時教授公尙爲諸生映雪囊螢不治家人生產業家徒壁立公嘆曰有子而使其父憂俯仰不克

竟所志又惡在其爲有子乎乃投筆改業退而沽酒當壚日夜持
籌爲事親計教授公家貧而好客公事之有曾子養曾皙風教授
公自爲諸生以及宦遊燕趙齊魯間垂三十年一切日用資斧罔
不周裕皆公竭力供之甚至稱貸以娛其心志而教授公不知也
異母弟凡五人次第婚嫁悉公營辦及教授公之任公令諸弟侍
行而已守舊廬作業不輟教授公歸行李蕭然所遺圖書及舊廬
盡推讓諸弟教授公及繼母徐先後棄養其喪葬悉遵會典及文
公家禮且獨任之不少累諸弟鄉人有子獲罪於父者其父怒不
解公聞而勸慰其父援古証今剴切懇到聞者莫不酸鼻其子遂
悲號自責卒復父子之好嘗携僕之教授公任就食旅舍僕陰竊
其直公覺識其主人比還令僕如數償之天性孝友輕財重義類

如此平於萬曆丙子九月年六十有六葬舊城北祖塋萬曆壬寅
贈奉直大夫冀州知州制稱公負薛包之至性善處母子兄弟之
間迨陳實之高風獨標里黨鄉閭之譽嗚呼亦可以不朽矣

楊尙渾字無鑿嘉猷子也佟國隴處士無鑿楊公墓誌銘曰公諱
尙渾字無鑿大父諱濂以孝聞生子五人而中順大夫貴州鎮遠
太守蓋齋公其季子也蓋齋生公於荆山之陽少長志氣不羣閉
館跌坐殆有夙悟蓋齋公筮仕冀北移延州遷長蘆擢鎮遠皆承
歡膝下而不分志功名以衰落色養其在延之靖邊也佐贊帷幄
一言而阻黃台吉三娘子之賞歲省數萬金當日以經生籌邊督
撫薦公偉文英武敘邊功者三題敘酌用而公不受文戰不勝飄
然究心典籍流連歌詠其所云卽獲朝榮如千秋何蓋其志也處

鄉仁義克修引掖族屬不論賢者能者勤者怠者慧者樸者因材而砥礪之舉族人文一時蔚起弟子員三十有餘人明經有人特選有人非公一人作之標指歟懿德不能盡闡如統族人而自編里蠲公田以應雜徭出已田以妥邱墓收伶仃以完婚娶公而決仁而普晚年構逸我齋岫雲小閣儲古今奇書尤耽謝山人榛吳川樓稿余先人之流寓荆山也隱於醫公見而敬之把臂定交故先人久托荆山余伯仲定省頻相來往親炙渠誨焉歲在丁丑先人抱疴流逆破縣國隳奉先人與公接舟避難賊以焚舍呼公以示恐嚇公夷然不顧與邑侯設計張幟驚賊遁去及歸料理瓦礫剪茅而棲有席地卽吾廬之句余先人越新歲卽捐賓客公弔焉中有豕散四方逢盜寇身餘一病殞關河余梓戚有次韻者天地

無情理霍衛乾坤若個定干戈又有一生未得死于戈之句先是公收邊功不就陳太傅海上聘公亦不就公居身坦夷持重和平近人一當緩急經緯常變無不咸宜喜怒不形終身無戚戚之容臨終索筆草書一絕云床頭別兒女泉下謁君親生平願足矣何用淚橫衫復云生前雖有職銜誌狀不得輕列當以處士題之亦不許號泣以亂我性使我清淨以還造化言畢瞑目而逝順生達命益徵生平之學之識爲有本云公有片月樓稿皖桐何文端公所敘岫雲閣草尙未梓行生萬曆壬午五月卒順治壬辰八月葬於塗山之陽宗家塋之左合先塋而墓焉銘曰公之至性生能奉親公之大節死不忘君胸秘六韜倉卒靖亂操嚴一介慷慨排難巖巖山高湛湛水深仕宦不遂譽望可尋礪石淮南藏之萬古維

德不愆我銘非詡 子培造宇舍兆順治乙酉武舉明季時邑多
草竊之患培造有攘禦功

黃尙義歲貢生考授海州知州多惠政歿之日家無餘財海州民
如喪慈母焉

劉逢慶字善甫江西靖安縣典史慎修官守折獄公民明稱爲四
老子劉青天

段琪寺正莓之孫也性純厚嗜善好讀書尤精易課能決禍福無
差修橋梁神祠其功甚多士大夫居林下者引與延齡之會縣司
屢召鄉飲惟一出以應其命卒年九十三 舊縣志

李貞篤於孝義家稍裕喜施予凡公私建修必極力助役嘗行路
拾遺金歸懸於門月餘無認者乃增貲買香木召匠雕觀音像置

於大聖寺佛殿後世謂倒坐觀音是也又嘗過妻兄張簡家見有
金一錠在地賢以足蹴之若無覩焉天順二年饑奉例同錢忠張
友盛各輸粟四百石備賑詔旌其門後嗣多以儒顯 舊縣志

袁鏗性純篤重義喜施學訓張天佑卒於任貧無以爲殮公家有
桐板價值數十金卽治棺贈之又資其路費市有賣線嫗被掠行
且哭公卽資與家絮十斤竟不問其姓名歲饑有司勸賑公先行
輸粟固辭冠帶之賜助濟親族其事尤多奉孀母侍疾居喪曲盡
子道縣司榮以壽官請與鄉飲子穉官至長史稷授照磨孫鶴年

入縣庠厚德之報也卒年八十六

舊縣志

舊府志

孫政平生尙義好施比老彌篤居於縣北清溝之陽每值淫澇溝
水泛溢行者病焉公建石橋木橋各三座以通往來今爲石橋集

宗族貧乏者周濟惟恐不及卒年八十二子鏞能繼其志事二親孝與人信家頗裕貸者不能償輒燬其券從兄立家貧有子秉陽勤學鏞奇之與弟鏞鏗銳議召秉陽與已子章等共學而資給之後二子俱宦達秉陽成進士官至副使有終身之感至今其子孫甚蕃昌焉

舊縣志

徐彥良性慈善遇歲荒與弟彥聰捐貲易米煮粥以食饑民捨棺百口以埋道殣不足則捨地爲坑聚屍掩之嘉靖己亥縣令旌爲

義門

舊縣志

吳瑚平生誠實事親盡孝伯父江無子瑚養其夫婦終身殯葬以禮其姑適陸洋早寡瑚禮請歸宗事生送死一如其父母鄉閭有爭訟者務爲和解人亦重其忠信多服從焉萬曆五年知縣謝公

懷遠縣志

卷二

傳老月廿四

一一

榮以冠帶請鄉飲年七十三卒

舊縣志

廖冠美原籍江西泰和縣父伯斐任懷遠令遂家焉冠美占籍由歲貢歷任雙流縣南海縣知縣弟冠平正統六年輸小麥千一百石入官賑濟勅賜羊酒旌爲義門冠正景泰五年輸粟五百石賑饑奉勅旌表冠王景泰四年輸粟五百石賑饑恩賜冠帶

舊志云廖冠平南隅人按邑中無南隅地名廖氏今居龍亢冠正舊作官正亦誤今從廖氏譜改

張簡北隅人

按邑中亦無北隅地名

正統五年輸小麥千二十石賑饑景泰

四年復出粟三百五十石恩賜冠帶錢忠張友盛李賢各輸粟四百石俱蒙旌表

舊縣志

韋福海天順二年輸粟一百石詔旌其義立石於門

舊縣志

何極捐貲建文筆塔於小塗山爲儒學風氣之助本縣給冠帶門
扁旌之

舊縣志

沈盈住何家溜以賣飯爲生萬曆庚子四月蒙城縣差里長俞棟
等解餉銀一百兩赴府借宿盈家次早行急遺銀床下以去行及
百里始覺急回覓取盈卽以原袋付之棟欲酬以半堅拒不受同
質於邑侯劉公公義之具申賴道楊公行縣榮以冠帶匾其門曰
還金義士

舊縣志

賈大成增生其增父也天性至孝以耕讀課其子備黃河西決渦
水泛濫渡者苦之捐貲特置義渡往來稱便其他施予利濟不能
悉述崇正間公舉鄉飲前鳳泗兵備使莊公祖誼爲題其墓以示

風焉

舊縣志

懷遠縣志

卷三

傳者百餘

一一一

宋義字仲宜號西湖性至孝弟禮蚤世弟婦趙氏年僅十八遺孤
曰堂公撫卹孤寡恩義備周時值嘉靖二三年大荒巡撫胡公勸
賑公於鳳懷兩縣捐粟千石胡公賢之欲聞於朝授以冠帶固辭
楊時秀明故處士西湖宋公墓誌銘翁諱義字仲宜別號西湖
其先彥和公居鳳之長安山繫籍皇陵奉太祖高皇帝特旨重
豐鎬舊懿世復其家彥和公孫選生良字啟善配尹氏生翁兄
弟三人兄諱杲弟諱禮俱先卒啟善公潛德弗耀族大而柝自
鳳遷懷邑之廣盈里以居里尙豪俠正德辛未間流寇猖獗翁
奉啟善公命居縣之河北去廣盈約五十里往復定省弗替翁
性醇厚貌豐偉持身居家動有矩度兄遺子曰學曰倫曰勳翁
皆推因心之愛以撫之弟禮遺孤曰堂甫四歲慈育保全時其

冠婚教以耕讀視若已子令克豐裕而弟婺趙氏得以享有子之養以完節義爲宋門光者翁之澤也嘉靖二三年歲值大歉巡撫胡公籍大姓以勸眾翁慨然輸粟數百斛因命以冠服自稱犁鋤人不敢拜胡公嘉其良善而慰勞之翁又復私出粟以賑時道殣相望乃於里居之南約貧民以掩骼而出息以償其勞其義尙種德類如此年四十餘家益饒足謙退自居尊賢敬士恤貧睦親識與不識皆慕其名郡邑士大夫見之者咸敬而重之戊申秋九月二十六日偶膺疾遽命遷於正寢戒其子若孫曰吾已矣爾輩勿失耕讀毋事非爲庶可爲人也言既而卒壽七十有六葬於青塚村之陽銘曰巖巖鳳山龍盤雲蒸渾龐沕穆時生老成慕義嗜禮綽有令名葆貞茹潔軒冕何榮乘鴻

而飛觀化冥冥不忘者存而後其興

宋允殖字民若義孫年十五入鳳陽學萬曆元年恩貢任廣西柳州府通判歷署府縣居官清苦軍民獐獯無不戴德卒祀鳳陽府學孝義祠

右二人舊志不載宋樞採訪補

張鸞樂善二畮人務本力農足跡不至城市晚年齒落更生目瞽數年忽然見物飲食步履與盛年無異生四子十有二孫壽一百十六歲

舊縣志

翟整翟家塋人也樸實務農壽百有六歲

舊縣志

支一元龍亢集人世務農業年九十餘猶若壯年前邑侯旌其閭曰鹿圃仙踪後無疾而卒壽百有一歲

舊縣志

廩生宮思晉校字

懷遠縣志

卷三

傳老百舊

二四